

regno; de orzi sono per tutto chiuxe, e tari dieci valeno; li semenadi sono assai et fin qui vano bene; ancor dexiderasi aqua. Nostro Signor el tutto a prefizione conduchi. E quanto pur succederà degno de Vostra Sublimità, quella per mie ne sarà notificata; in la cui gratia mei fradeli e mi ricomando.

35 *A dì 19, fo Santo Ixepo.* Fo gran pioza la matina, et tal zorno si varda da uno anno in qua per devution grande, che prima non si vardava, *tamen* era l'altar e scuola a San Silvestro; hora in queste guerre è stà fato una chiesa e monastier a Castello driedo Santo Antonio, dove è alcune monache di vita observante, et li vien fato assa' elemosine. El monastier è di taole, e la chiesa si anderà fabricando di muro.

Di Are, di sier Sebastian da cha' Taiapiera provedador. Come à aviso, il capitano Archon e il vicerè e quelli altri capi aver dito si voleno levar dil Polesene e venir alozar in visentina et lassar presidii a Montagnana. Hanno ordinato non far danni su el Polesene, e stanno con guardie; dubitano assai; è pocha zente, non è cavalli... et fanti 3000 in tutto.

Di Padoa, dil capitano zeneral. Come spagnoli volseno lassar uno commissario in Montagnana, e quelli di la terra non hanno voluto acceptarli, dicendo venirano li nostri cavali e li sacomanerano; e altre occorentie zercha il campo; tutavia sollicita a fabricar e fortificar Padoa. Biasima molto le fortification fate a Treviso, qual li reperi tutti è ruinadi, et vol meter Treviso in forteza.

Di Cao d' Istria, di sier Alvixe Barbaro podestà et capitano. Come ha inteso motion di corvati, quali voleno venir a depredar l'Istria; à fato intender questo al capitano di Raspo e altri lochi che stagino riguardosi etc.; con altre occorentie, *ut in litteris*.

Di Udene, di sier Lunardo Emo luogotenente. Come quelli corvati tutti partino di Maran, è andati a Gradisca et aspetano tochar danari, et poi grossi venir in la Patria etc.

Da poi disnar, fo Colegio di Savii *ad consulendum*.

A dì 20. La matina, vene in Colegio sier Andrea Bondimier venuto capitano di l'Adexe, vien di Carvare; come ho scritto, vene amalato. Hora dice è al comando di la Signoria di ritornar o star; et non fo aldito per le occupation si ave.

Vene il reverendissimo patriarcha nostro domino Antonio Contarini *junior*, et con li Cai di X stete et parlò prima in materia di alcuni greci quali

voleno far una chiesa in Biri, che non se dia soportar che i fazino per aver alcuni riti contra la chiezia romana, e li basta la chiesa di San Biaxio à li Calojeri overo Papa, dove si celebra a la grecha, e non far altre chiese.

Fo leto tre oblation di zentilhomeni oferiscono dar danari per armar e andar soracomito e podestà. È da saper: sier Vettor di Garzoni qu. sier Marin procurator per avanti oferse ducati... per armar et fo acetà il partido, justa la parte, per esser rimasto sopracomito per parte posta in Gran Conseo in locho di sier Zuan so fradello, che morì. Hor 35* al presente, sier Alvixe da Riva di sier Bernardino, 38 qual *etiam* à una gratia di andar soracomito in loco di sier Vincenzo da Riva so fradello, che morì, vol prestar a la Signoria ducati 500 et armar al presente; sier Zuan Malipiero di sier Hironimo vol prestar ducati 1000; sier Beneto Guoro qu. sier Pandolfo vol prestar ducati 1000 et esser sopracomiti e armar; le qual tre oblation lecte in Colegio, si baloterà il primo Pregadi.

Di Padoa, dil capitano zeneral, di eri sera. Come à uno aviso di Babon di Naldo, eh' è a la guarda di fuora, che li scrive à inteso è un trattato in Padoa. Esso capitano, scrive, sta riguardoso e non lo crede, perche chi vol far tal cossa non si va vo-ciferando.

In questi zorni, la peste comenzò. Eri fo do a San Job in l'hospital, et San Boldo in l'hospital di Pizochare; si fa ogni bona provision. Idio vardi, che saria gran dano a le cosse nostre!

Da poi disnar, fo Colegio di la Signoria e Savii, e alditeno sier Bortolamio da Mosto savio a terra ferma, ritornato zà tre zorni di far la monstra di le fantarie nostre a Citadella et altrove stato, qual referi aver casso fanti numero... et reduti su numero... et disse la condition di quelli, e di gran danni fanno per le ville dove sono alozati, et altre particolarità; et è stato a Uderzo, dove segui il remor di fanti con i villani.

In questo Colegio *etiam* fo aldito sier Piero Bragadin qu. sier... de chi è 'l safil di charati 128, bellissima zoia, havea Anselmo zudio *dal banco* in pegno per li ducati 3000, et è stà tolto in la Signoria per darlo a l'orator di Hongaria che l'ha richiesto. Et disse come è suo, e l'avia venduto al magnifico Giuliano per ducati 4000; sichè la Signoria non li fazi questo danno. Li qual ducati 1000 se meterà a l'incontro dil debito l'ha con la Signoria, et si meterà poi a conto dil re di Hongaria ducati 4000. E cussì aldito el zudio, dicendo quello